

**“ТАСДИҚЛАНГАН”**



**“Milliy banklararo protsessing markazi”**

**акциядорлик жамияти**

**яёна акциядорининг**

**2024 йил 2 августдаги**

**179/09-2-qr-сон қарори билан**

**“MILLIY BANKLARARO PROTSESSING MARKAZI”**

**АКЦИЯДОРЛИК ЖАМИЯТИНИНГ**

**АКЦИЯДОРЛАР УМУМИЙ ЙИГИЛИШИ ТЎҒРИСИДАГИ НИЗОМИ**

**Тошкент – 2024**

## I. УМУМИЙ ҚОИДАЛАР

1.1. Ушбу Низом “MILLIY BANKLARARO PROTSESSING MARKAZI” АЖ (бундан буён матнда - Жамият) акциядорлари умумий йиғилишининг мақоми ва ваколатларини белгилайди, акциядорларнинг умумий йиғилишини ташкиллаштириш, чақириш ва ўтказиш муддатларини ҳамда шартларини, шунингдек қарор қабул қилишни тартибга солади.

1.2. Акциядорларнинг умумий йиғилиши Жамиятнинг олий бошқарув органи ҳисобланади.

1.3. Мазкур Низом Ўзбекистон Республикасининг “Акциядорлик жамиятлари ва акциядорларнинг ҳуқуқларини ҳимоя қилиш тўғрисида”ги Қонуни ва бошқа норматив ҳуқуқий ҳужжатларга, шунингдек Жамиятнинг Уставига мувофиқ ишлаб чиқилган.

1.4. Жамият ҳар йили акциядорларнинг йиллик (навбатдаги) умумий йиғилишини ўтказиши шарт. Акциядорларнинг йиллик умумий йиғилиши молия йили тугаганидан кейин олти ойдан кечиктирмай ўтказилади. Акциядорларнинг йиллик (навбатдаги) умумий йиғилиши одатда март-июн ойларида ўтказилади. Шу билан бирга, Кузатув кенгаш мавжуд вазиятдан келиб чиқиб, акциядорларнинг умумий йиғилиши санасини кўриб чиқиш ва йиғилишга бошқа санани тайинлаш ҳуқуқига эга.

1.5. Акциядорларнинг йиллик умумий йиғилишида қуйидаги масалалар ҳал этилади:

- Кузатув кенгаш ва Тафтиш комиссиясини сайлаш;
- Жамиятнинг Бошқарув раиси ва аъзолари билан шартнома тузиш, шартномани узайтириш, қайта тузиш ёки бекор қилиш;
- Жамиятнинг ривожланиш стратегиясига эришиш учун кўрилган/кўрилаётган чора-тадбирлар тўғрисида Жамиятнинг йиллик ҳисоботини, Кузатув кенгаш ва Ижроия (Бошқарув) органи ҳисоботларини кўриб чиқиш ва тасдиқлаш;
- Жамиятнинг фойда ва зарарларининг тақсимлаш;
- Ўзбекистон Республикаси қонунчилигига, Уставга, ушбу Низомга мувофиқ Акциядорларнинг умумий йиғилиши ваколатига тааллуқли бўлган бошқа масалалар.

1.6. Акциядорларнинг йиллик умумий йиғилишидан ташқари ўтказиладиган йиғилишлари акциядорларнинг навбатдан ташқари йиғилишлари деб ҳисобланади.

1.7. Акциядорлар умумий йиғилишини ўтказиш санаси ва тартиби, уни ўтказиш ҳақида акциядорларни хабардор қилиш тартиби ва акциядорларнинг умумий йиғилишига тайёргарлик кўришда акциядорларга тақдим этиладиган материаллар (ахборот) рўйхати Жамиятнинг Кузатув кенгаши томонидан белгиланади, акциядорларнинг умумий йиғилиши акциядор (акциядорлар)нинг ташаббуси билан чақирилган ҳоллар бундан мустасно.

## II. АКЦИЯДОРЛАР УМУМИЙ ЙИҒИЛИШИНING ВАКОЛАТЛАРИ

2.1. Акциядорлар умумий йиғилишининг ваколатига қуйидагилар киради:

- 2.1.1. Жамиятнинг Уставига ўзгартириш ва қўшимчалар киритиш ёки Уставнинг янги тахририни тасдиқлаш, ўз капитали ҳисобига жамиятнинг устав капитали ошиши муносабати билан ўзгартиришлар киритилган ҳоллар бундан мустасно;
- 2.1.2. Жамиятни қайта ташкил этиш;
- 2.1.3. Жамиятни тугатиш, тугатувчини (тугатиш комиссиясини) тайинлаш ва даврий ва якуний тугатиш балансларини тасдиқлаш;
- 2.1.4. Кузатув кенгаши аъзолари ва миноритар акциядорлар қўмитаси сон таркибини аниқлаш, Кузатув кенгаши аъзоларига қўйиладиган малакавий талаблар, унинг аъзоларини сайлаш ва уларнинг ваколатларини муддатидан илгари тугатиш. Кузатув кенгаши аъзоларига мукофот пуллари ва компенсациялар тўлаш тўғрисида қарор қабул қилиш;
- 2.1.5. Эълон қилинган акцияларнинг максимал миқдорини аниқлаш;
- 2.1.6. Эълон қилинган акциялар сони доирасида қўшимча акцияларни жойлаштириш орқали Жамиятнинг устав капиталини ошириш;
- 2.1.7. Жамиятнинг устав капиталини камайтириш;
- 2.1.8. Ўз акцияларини қайтариб сотиб олиш;
- 2.1.9. Жамиятнинг ташкилий тузилмасини тасдиқлаш;
- 2.1.10. Ижро (Бошқарув) органини шакллантириш, Бошқарув раиси ва аъзоларини сайлаш (тайинлаш);
- 2.1.11. Жамиятнинг Тафтиш комиссияси аъзоларини сайлаш ва уларнинг ваколатларини муддатидан илгари тугатиш, шунингдек Тафтиш комиссияси тўғрисидаги Низомни тасдиқлаш. Тафтиш комиссияси аъзоларига мукофот пуллари ва компенсациялар тўлаш тўғрисида қарор қабул қилиш;
- 2.1.12. Жамиятнинг йиллик ҳисоботларини тасдиқлаш, шунингдек, Жамият фаолиятининг асосий йўналишлари ва мақсадларидан келиб чиқиб, Жамиятнинг ўрта ва узоқ муддатли ривожланиш стратегиясини тасдиқлаш;
- 2.1.13. Кузатув кенгашининг ҳисоботларини ва Жамиятнинг Тафтиш комиссиясининг ўз ваколатлари доирасидаги масалалар, шу жумладан Жамиятни бошқариш бўйича қонунчилик талабларига риоя қилиш бўйича хулосаларини эшитиш;
- 2.1.14. Акцияларни ва акцияларга айирбошланадиган қимматли қоғозларни сотиб олишда акциядорларнинг имтиёзли ҳуқуқини қўлламаслик тўғрисида қонунчиликда назарда тутилган қарорни қабул қилиш;
- 2.1.15. Жамиятнинг фойда ва зарарларини тақсимлаш;
- 2.1.16. Дивидендлар тўлаш, дивиденд миқдори, дивиденд тўлаш шакли ва тартиби тўғрисида қарор қабул қилиш;
- 2.1.17. Мажбурий аудиторлик текширувини ўтказиш учун аудиторлик ташкилотининг аниқлаш, унинг хизматлари учун тўловнинг энг кўп миқдорини белгилаш ва у билан шартнома тузиш (бекор қилиш) тўғрисида қарор қабул қилиш;
- 2.1.18. Халқаро молиявий стандартларга мувофиқ йиллик молиявий ҳисоботларни эълон қилишга ўтиш учун малакали аудиторлик ёки консалтинг ташкилотини жалб қилиш, унинг хизматлари учун тўловнинг энг кўп миқдорини белгилаш ва у билан шартнома тузиш (бекор қилиш) тўғрисида қарор қабул қилиш;
- 2.1.19. Акциядорлар умумий йиғилишининг регламентини тасдиқлаш;
- 2.1.20. Акцияларни майдалаш ва йириклаштириш;

2.1.21. Қонунчиликда ва жамият Уставида белгиланган тартибда жамиятнинг мол-мулк сотиб олиши ва мол-мулкни бегоналаштирилиши билан боғлиқ йирик битимларни тузиш;

2.1.22. Қонунчиликда ва жамият Уставида белгиланган тартибда аффилланган шахслар билан битимлар тузиш;

2.1.23. Жамиятнинг кундалик хўжалик фаолияти билан боғлиқ битимларни аниқлаш;

2.1.24. Жамиятнинг Бошқарув органлари, шу жумладан Ички назорат, Дивиденд сиёсати ва Манфаатлар тўқнашувида амалга ошириладиган ҳаракатлар тартиби тўғрисидаги Низомларни тасдиқлаш;

2.1.25. Ҳомийлик (хайрия) ёки бегараз ёрдамнинг энг кўп миқдорини белгилаш;

2.1.26. Қонун ҳужжатларига мувофиқ бошқа масалаларни ҳал этиш.

2.2. Акциядорлар умумий йиғилишининг мутлақ ваколатларига кирувчи масалалар бўйича қарор қабул қилиш Кузатув кенгаши ва Жамиятнинг ижро органига берилиши мумкин эмас.

2.3. Қўйидаги масалалар бўйича қарорлар Акциядорлар умумий йиғилишида иштирок этаётган овоз берувчи акцияларнинг эгалари бўлмиш акциядорларнинг тўртдан уч қисмидан иборат кўпчилик овози (малакали кўпчилик) билан қабул қилинади:

- Жамиятнинг Уставига ўзгартириш ва қўшимчалар киритиш ёки Жамиятнинг Уставини янги таҳрирда тасдиқлаш;

- Жамиятни қайта ташкил этиш;

- Жамиятни тугатиш, тугатувчини тайинлаш (тугатиш комиссияси) ва оралик ва якуний тугатиш балансларини тасдиқлаш;

- эълон қилинган акцияларнинг энг кўп миқдорини белгилаш;

- Кузатув Кенгашининг ҳисоботларини ва Жамиятнинг Тафтиш комиссиясининг (агар мавжуд бўлса) ўз ваколатлари доирасидаги масалалар бўйича хулосаларини эшитиш;

- Жамият томонидан йирик битимларни тузиш;

- Жамият томонидан аффилланган шахслар билан битимларни тузиш;

2.4. Овозга қўйилган бошқа масалалар бўйича қарорлар Акциядорларнинг умумий йиғилишида иштирок этувчи Жамиятнинг овоз берувчи акциялари эгалари - акциядорларнинг кўпчилик овози билан қабул қилинади.

2.5. Акциядорларнинг умумий йиғилиши кун тартибига киритилмаган масалалар бўйича қарор қабул қилишга, шунингдек, кун тартибига ўзгартиришлар киритишга ҳақли эмас.

### **III. АКЦИЯДОРЛАРНИНГ УМУМИЙ ЙИҒИЛИШИДА ИШТИРОК ЭТИШ ТАРТИБИ**

3.1. Акциядорларнинг умумий йиғилиши расман эълон қилинган санадан уч иш (календар) кун олдин шакллантирилган жамиятнинг акциядорлари реестрида рўйхатга олинган акциядорлар Акциядорларнинг умумий йиғилишида иштирок этиш ҳуқуқига эга ҳисобланади.

3.2. Акциядорнинг талабига кўра, Жамият унга Акциядорларнинг умумий йиғилиши учун шакллантирилган акциядорлар реестрига киритилганлиги тўғрисида маълумот тақдим этиши шарт.

3.3. Жамият акциядорлари реестрига ўзгартириш ва қўшимчалар киритишга йўл қўйилмайди.

3.4. Акциядорларнинг умумий йиғилишида акциядорлар реестрида рўйхатга олинган акциядорлар, уларнинг ваколатли вакиллари, ички аудит хизмати ходимлари, санок комиссияси, аудиторлик текширувини ўтказган аудиторлик ташкилоти вакили, Кузатув кенгаш аъзолари, шунингдек Миноритар акциядорлар қўмитаси (мавжуд бўлган тақдирда), Кузатув кенгаши раисининг таклифига биноан бошқа шахслар иштирок этиши мумкин.

3.5. Умумий йиғилишда иштирок этиш учун акциядорлар ёки уларнинг ваколатли вакиллари йиғилиш ўтказилиши белгиланган жойда ва вақтда рўйхатдан ўтишлари керак.

3.6. Акциядорларнинг умумий йиғилишида иштирок этиш учун келган жисмоний шахсларни паспорт ёки акциядор шахсини тасдиқловчи бошқа ҳужжат тақдим этилганда, вакилни нотариус томонидан тасдиқланган ишончномага кўра рўйхатга олиш амалга оширилади.

3.7. Акциядорларнинг умумий йиғилишида Жамиятнинг акциядори бўлган юридик шахс раҳбари ўз ваколатларини лавозимга тайинланиши тўғрисидаги ҳуқуқий ҳужжат асосида ва шахсини тасдиқловчи ҳужжат асосида амалга оширади.

3.8. Акциядорнинг вакили - юридик шахс ўз номига ташкилотнинг раҳбари ёки қонунчиликка мувофиқ ваколат берилган бошқа шахснинг имзоси билан берилган ушбу ташкилотнинг муҳри билан тасдиқланган ишончномага эга бўлганда, акциядорларнинг умумий йиғилишида иштирок этиши мумкин.

3.9. Акциядор исталган вақтда Акциядорларнинг умумий йиғилишида ўз вакилини алмаштириши ёки унда шахсан ўзи иштирок этиши мумкин.

3.10. Акциядорларнинг умумий йиғилишида кун тартибидаги масалалар бўйича овоз бериш овоз бериш бюллетенлари орқали ёки ахборот-коммуникация технологияларидан фойдаланган ҳолда масофадан туриб амалга оширилиши мумкин. Акциядорларнинг умумий йиғилишида кун тартибидаги масалалар бўйича ахборот-коммуникация технологияларидан фойдаланган ҳолда масофадан туриб овоз берилганда овоз бериш бюллетенларидан фойдаланилмайди. Бунда овозга қўйилган масалалар бўйича қабул қилинган қарорнинг қонунийлиги акциядорни акциядорларнинг умумий йиғилишида иштирок этиш учун рўйхатга олишда фойдаланиладиган электрон рақамли имзо билан тасдиқланади.

#### **IV. АКЦИЯДОРЛАРНИНГ ЙИЛЛИК УМУМИЙ ЙИҒИЛИШИГА ТАЙЁРГАРЛИК КЎРИШ**

4.1. Жамиятнинг ижро органи акциядорлар умумий йиғилишига тааллуқли бўлган барча материалларни ишлаб чиққандан (тайёрлагандан) сўнг уларни Кузатув кенгашига кўриб чиқиш ва муҳокама қилиш учун тақдим этади.

4.2. Акциядорларнинг умумий йиғилишига тайёргарлик кўрилаётганда Жамиятнинг Кузатув кенгаши қуйидаги масалаларни аниқлайди:

- умумий йиғилишни ўтказиш санаси, жойи ва вақтини;
- умумий йиғилиш кун тартибини;
- Акциядорларнинг умумий йиғилиши ўтказиш ва акциядорларни хабардор қилиш учун акциядорлар реестрини шакллантириш санасини;
- умумий йиғилиш ўтказилиши ҳақида акциядорларни хабардор қилиш тартибини;
- умумий йиғилишга тайёргарлик кўришда акциядорларга тақдим этиладиган маълумотлар (материаллар) рўйхатини;
- овоз бериш бюллетенининг шакли ва матнини;
- акциядорларнинг умумий йиғилишида иштирок этиш ва овоз бериш, шу жумладан ахборот-коммуникация технологияларидан фойдаланган ҳолда масофадан туриб иштирок этиш ва овоз бериш тартиби ва бошқа масалаларни.

4.3. Акциядорларнинг умумий йиғилиши ўтказиладиган сана уни ўтказиш тўғрисида қарор қабул қилинган кундан эътиборан йигирма бир кундан кам ва ўттиз кундан кўп этиб белгиланиши мумкин эмас.

4.4. Акциядорларнинг умумий йиғилишини ўтказиш тўғрисидаги хабар акциядорларнинг умумий йиғилиши ўтказиладиган санадан камида йигирма бир кундан кечиктирмай, лекин узоғи билан ўттиз кун олдин Корпоратив ахборотнинг ягона порталида, Жамиятнинг расмий веб-сайтида ва оммавий ахборот воситаларида эълон қилинади, шунингдек акциядорларга электрон почта орқали юборилади.

4.5. Акциядорларнинг умумий йиғилишини ўтказиш тўғрисидаги хабарда қуйидагилар кўрсатилиши керак:

- Жамиятнинг номи, жойлашган ери (почта манзили) ва электрон почта манзили;
- умумий йиғилиш ўтказиладиган сана, вақт ва жой;
- Жамият акциядорларининг реестри шакллантириладиган сана;
- умумий йиғилиш кун тартибига киритилган масалалар;
- умумий йиғилишни ўтказишга тайёргарлик кўрилаётганда акциядорларга тақдим этилиши лозим бўлган ахборот (материаллар) билан акциядорларни таништириш тартиби;
- акциядорларнинг умумий йиғилишида иштирок этиш ва овоз бериш, шу жумладан ахборот-коммуникация технологияларидан фойдаланган ҳолда масофадан туриб иштирок этиш ва овоз бериш тартиби.

4.6. Акциядорларнинг умумий йиғилишини ўтказишга тайёргарлик кўрилаётганда акциядорларга тақдим этилиши лозим бўлган ахборотга (материалларга) Жамиятнинг йиллик ҳисоботи, Жамиятнинг йиллик молия-хўжалик фаолиятини текшириш натижалари юзасидан аудиторлик ташкилотининг хулосаси, Кузатув кенгашининг Бошқарув раиси билан тузилган шартноманинг амал қилиш муддатини узайтириш, шартномани қайта тузиш ёки бекор қилиш мумкинлиги тўғрисидаги хулосаси, шунингдек Кузатув кенгашга номзодларнинг маълумотлари ва х.к. Акциядорларнинг умумий йиғилишини ўтказишга тайёргарлик кўрилаётганда акциядорларга тақдим этилиши мажбурий бўлган қўшимча ахборотнинг (материалларнинг) рўйхати қимматли қоғозлар бозорини тартибга солиш бўйича ваколатли давлат органи томонидан белгиланиши мумкин. Акциядорларга берилиши лозим бўлган ахборотдан (материаллардан) акциядорларнинг умумий йиғилишида иштирок этадиган, шу жумладан ахборот-коммуникация технологияларидан фойдаланган ҳолда масофадан туриб иштирок этадиган шахслар акциядорларнинг умумий

йиғилиши ўтказилгунига қадар ва уни ўтказиш вақтида фойдалана олиш имкониятига эга бўлиши керак.

4.7. Жамият овоз берувчи акцияларининг ҳаммаси бўлиб бир фоиздан кам бўлмаган оддий акциялари эгалари (акцияси эгаси) Кузатув кенгаш мажлисини чақиришни талаб қилишга ва кун тартиби, фойдани тақсимлаш, бошқарув ва назорат органи аъзолигига номзодларини (умумий йиғилиш ўтказилгунга қадар алмаштириш имконияти билан) кўрсатиш юзасидан таклиф киритиш ҳуқуқига эга.

4.8. Жамият овоз берувчи акцияларининг ҳаммаси бўлиб бир фоиздан кам бўлмаган оддий акциялари эгалари (акцияси эгаси) молия йили тугаганидан кейин узоғи билан 90 кундан кечикмай, акциядорларнинг йиллик умумий йиғилиши кун тартибига масалалар киритишга ҳамда жамият Кузатув кенгаши ва жамият Тафтиш комиссиясига бу органларнинг миқдор таркибидан ошмайдиган тарзда номзодлар кўрсатишга ҳақли.

4.9. Акциядорлар (акциядор) жамият Кузатув кенгаши ва Тафтиш комиссиясига ўзлари кўрсатган номзодлар рўйхатига акциядорларнинг йиллик умумий йиғилиши ўтказилиши тўғрисидаги хабар эълон қилинган санадан эътиборан уч иш кунидан кечиктирмай ўзгартишлар киритишга ҳақли.

4.10. Акциядорлар умумий йиғилишининг кун тартибига масала уни қўйиш сабаблари, масалани киритаётган акциядорларнинг (акциядорнинг) исми-шарифи (номи), уларга тегишли акцияларнинг сони ва тури кўрсатилган ҳолда ёзма шаклда киритилади. Жамият кузатув кенгашига номзодлар кўрсатиш тўғрисида таклифлар киритилганда, шу жумладан ўзини ўзи номзод қилиб кўрсатилган тақдирда номзоднинг исми-шарифи, унга тегишли акцияларнинг сони ва тури (агар номзод Жамият акциядори бўлса), шунингдек номзодни кўрсатаётган акциядорларнинг исми-шарифи (номи), уларга тегишли акцияларнинг сони ва тури кўрсатилади.

4.11. Жамиятнинг Кузатув кенгаши тушган таклифларни кўриб чиқиши ҳамда амалдаги қонунчиликда белгиланган муддатларда уларни акциядорларнинг умумий йиғилиши кун тартибига киритиш тўғрисида ёки мазкур кун тартибига киритишни рад этиш ҳақида қарор қабул қилиши шарт.

4.12. Кузатув кенгаш акциядорлардан келиб тушган таклифларни кўриб чиқиши ҳамда амалдаги қонунчиликда белгиланган муддат тугаганидан сўнг ўн кундан кечиктирмай уларни акциядорларнинг умумий йиғилиши кун тартибига киритиш тўғрисида ёки мазкур кун тартибига киритишни рад этиш ҳақида қарор қабул қилиши шарт.

4.13. Кузатув кенгашининг масалани акциядорлар умумий йиғилишининг кун тартибига ёки номзодни жамият Кузатув кенгаши ва Тафтиш комиссиясига сайлаш юзасидан овоз бериш учун номзодлар рўйхатига киритишни рад этиш тўғрисидаги асослантирилган қарори ана шу масалани киритган ёки таклиф тақдим этган акциядорга (акциядорларга) қарор қабул қилинган кундан эътиборан узоғи билан уч иш кун ичида юборилади.

4.14. Жамият кузатув кенгашининг масалани акциядорлар умумий йиғилишининг кун тартибига ёки номзодни Жамият кузатув кенгашига сайлов бўйича овоз бериш учун

номзодлар рўйхатига киритишни рад этиш тўғрисидаги қарори устидан судга шикоят қилиниши мумкин.

## **V. АКЦИЯДОРЛАРНИНГ НАВБАТДАН ТАШҚАРИ УМУМИЙ ЙИҒИЛИШИГА ТАЙЁРГАРЛИК КЎРИШ**

5.1. Акциядорларнинг навбатдан ташқари умумий йиғилиши жамият Кузатув кенгашининг қарорига кўра қуйидаги асосларга кўра ўтказилиши мумкин:

- ўз ташаббусига кўра;
- ёзма талаб тақдим этилган санада овоз берувчи акцияларининг камида беш фоизига эгалик қилувчи акциядорнинг (акциядорларнинг) ёзма талабига кўра.

5.2. Акциядорларнинг навбатдан ташқари умумий йиғилишини чақириш акциядорларнинг навбатдан ташқари умумий йиғилишини ўтказиш ҳақида ёзма талаб тақдим этилган кундан эътиборан ўттиз кундан кечиктирмай жамиятнинг Кузатув кенгаши томонидан амалга оширилади.

5.3. Акциядорларнинг навбатдан ташқари умумий йиғилишини ўтказиш тўғрисидаги талабда йиғилиш кун тартибига киритилиши керак бўлган масалалар уларни киритиш сабаблари кўрсатилган ҳолда таърифланган бўлиши керак.

5.4. Кузатув кенгашнинг ёки жамият овоз берувчи акцияларининг камида беш фоизига эгалик қилувчи акциядорнинг (акциядорларнинг) талабига кўра чақириладиган акциядорларнинг навбатдан ташқари умумий йиғилиши кун тартибига масалаларнинг таърифига ўзгартишлар киритилишига йўл қўйилмайди.

5.5. Акциядорларнинг навбатдан ташқари умумий йиғилишини чақириш тўғрисидаги талаб акциядордан (акциядорлардан) чиққан тақдирда, бу талабда умумий йиғилишни чақиришни талаб қилаётган акциядорнинг (акциядорларнинг) исми-шарифи (номи), унга тегишли акцияларнинг сони, тури кўрсатилган бўлиши лозим.

5.6. Акциядорларнинг навбатдан ташқари умумий йиғилишини чақириш тўғрисидаги талаб акциядорларнинг навбатдан ташқари умумий йиғилишини чақиришни талаб қилган шахс (шахслар) томонидан имзоланади.

5.7. Жамият овоз берувчи акцияларининг камида беш фоизига эгалик қилувчи акциядор (акциядорлар) акциядорларнинг навбатдан ташқари умумий йиғилишини чақириш тўғрисида талаб тақдим этган санадан эътиборан ўн кун ичида Кузатув кенгаш акциядорларнинг навбатдан ташқари умумий йиғилишини чақириш тўғрисида ёки йиғилишни чақиришни рад этиш ҳақида қарор қабул қилиши керак

5.8. Жамият овоз берувчи акцияларининг камида беш фоизига эгалик қилувчи акциядорнинг (акциядорларнинг) талабига кўра акциядорларнинг навбатдан ташқари умумий йиғилишини чақиришни рад этиш тўғрисидаги қарор қуйидаги ҳолларда қабул қилиниши мумкин, агар:

- акциядорларнинг навбатдан ташқари умумий йиғилишини чақиришни талаб қилаётган акциядор (акциядорлар) ушбу Низомнинг 5.1-бандида назарда тутилган миқдордаги жамият овоз берувчи акцияларининг эгаси бўлмаса;
- кун тартибига киритиш учун тақлиф этилган масалалардан бирортаси ҳам акциядорлар умумий йиғилишининг ваколат доирасига кирмаса;

• кун тартибига киритиш учун таклиф этилган масала қонун ҳужжатларининг талабларига мувофиқ бўлмаса.

5.9. Кузатов Кенгашнинг акциядорларнинг навбатдан ташқари умумий йиғилишини чақириш тўғрисидаги қарори ёки уни чақиришни рад этиш тўғрисидаги асосли қарори қабул қилинган кундан эътиборан уч иш кунидан кечиктирмай йиғилиш чақирилишини талаб қилаётган шахсларга юборилади.

5.10. Кузатов кенгашнинг акциядорларнинг навбатдан ташқари умумий йиғилишини чақиришни рад этиш тўғрисидаги қарори устидан судга шикоят қилиниши мумкин.

5.11. Жамият Кузатов кенгаши қонунчиликда белгиланган муддат ичида акциядорларнинг навбатдан ташқари умумий йиғилишини чақириш тўғрисида қарор қабул қилмаган бўлса ёки уни чақиришни рад этиш ҳақида қарор қабул қилинган бўлса, акциядорларнинг навбатдан ташқари умумий йиғилиши уни чақиришни талаб қилган шахслар томонидан чақирилиши мумкин.

5.12. Бундай ҳолларда акциядорларнинг умумий йиғилишини ўтказишга тайёргарлик кўриш билан боғлиқ харажатлар акциядорлар умумий йиғилишининг қарорига биноан жамиятнинг маблағлари ҳисобидан қопланиши мумкин.

## **VI. УМУМИЙ ЙИҒИЛИШНИНГ КВОРУМИ**

6.1. Агар акциядорларнинг умумий йиғилишида иштирок этувчиларни рўйхатга олиш тамом бўлган пайтга келиб, жамиятнинг жойлаштирилган овоз берувчи акцияларининг жами эллик фоизидан кўпига эга бўлган акциядорлар (уларнинг вакиллари) рўйхатдан ўтган бўлса, акциядорларнинг умумий йиғилиши ваколатли (кворум тўплаган) ҳисобланади.

6.2. Акциядорлар умумий йиғилишини ўтказиш учун кворум бўлмаса, акциядорларнинг янги умумий йиғилишини ўтказиш санаси эълон қилинади. Акциядорларнинг янги умумий йиғилишини ўтказишда кун тартибига ўзгартиришлар киритишга йўл қўйилмайди.

6.3. Ўтказилмай қолган йиғилиш ўрнига акциядорларнинг янги чақирилган умумий йиғилишида иштирок этувчиларни рўйхатга олиш тугаган пайтга келиб, жамиятнинг жойлаштирилган овоз берувчи акцияларининг жами қирқ фоизидан кўпроқ овозига эга бўлган акциядорлар (уларнинг вакиллари) рўйхатга олинган бўлса, бу умумий йиғилиш ваколатли ҳисобланади.

6.4. Кворум бўлмаганлиги сабабли акциядорларнинг умумий йиғилишини ўтказиш санаси 20 кундан кам муддатга кўчирилган тақдирда, умумий йиғилишда иштирок этиш ҳуқуқига эга бўлган акциядорлар ўтказилмай қолган умумий йиғилишда иштирок этиш ҳуқуқига эга бўлган акциядорларнинг реестрига мувофиқ аниқланади.

## **VII. АКЦИЯДОРЛАРНИНГ УМУМИЙ ЙИҒИЛИШИДА ОВОЗ БЕРИШ**

7.1. Акциядорларнинг умумий йиғилишида овоз бериш «жамиятнинг овоз берувчи битта акцияси-битта овоз» қондасига мувофиқ ўтказилади, жамиятнинг Кузатув кенгаши аъзоларини сайлаш бўйича кумулятив овоз беришни ўтказиш ҳоллари ва қонунчиликда назарда тутилган бошқа ҳоллар бундан мустасно.

## **VIII. АКЦИЯДОРЛАР УМУМИЙ ЙИҒИЛИШИНING БАЁННОМАСИ**

8.1. Акциядорлар умумий йиғилишининг баённомаси акциядорлар умумий йиғилиши ёпилганидан кейин ўн кундан кечиктирмай икки нусхада тузилади. Ҳар иккала нусха ҳам умумий йиғилишда раислик қилувчи ва умумий йиғилиш котиби томонидан имзоланади.

8.2. Акциядорлар умумий йиғилишининг баённомасида:

- акциядорлар умумий йиғилиши ўтказилган жой ва вақт;
- жамиятнинг овоз берувчи акцияларига эга бўлган акциядорлар овозларининг умумий сони;

- йиғилишда иштирок этган акциядорлар эга бўлган овозлар сони;

- йиғилишнинг раиси (раёсати) ва котиби, йиғилишнинг кун тартиби кўрсатилади.

Акциядорлар умумий йиғилишининг баённомасида нутқларнинг асосий мазмуни, овозга қўйилган масалалар ҳамда улар юзасидан ўтказилган овоз бериш натижалари, йиғилиш қабул қилган қарорлар акс эттирилиши лозим.

8.3. Умумий йиғилиш котиби:

- умумий йиғилиш баённомасини юритади;
- йиғилиш кун тартибидаги масала муҳокамасида ёзма талаблар асосида иштирок этишни хоҳловчилар рўйхатини юритади;
- Акциядорлар умумий йиғилиши якунланганидан кейин ўн кундан кечиктирмай икки нусхада Акциядорлар умумий йиғилиши баённомасини тузади.

8.4. Санок комиссиясининг баённомаси йиғилишнинг махсус қарори билан тасдиқланмайди, маълумот учун қабул қилинади ва умумий йиғилиш баённомасига илова қилинади.

## **IX. АКЦИЯДОРЛАР УМУМИЙ ЙИҒИЛИШИ ҚАРОРИНИ ИЖРО ЭТИШ**

9.1. Акциядорларнинг умумий йиғилиши томонидан қабул қилинган қарорлар ва овоз бериш натижалари акциядорлар эътиборига қуйидаги тартибда ҳавола этилади:

- акциядорларнинг умумий йиғилиши якунида (шахсан иштирок этилганда) ёки акциядорларнинг умумий йиғилиши ахборот-коммуникация технологияларидан фойдаланган ҳолда масофадан туриб ўтказилганда, акциядорларнинг умумий йиғилиши тугаганидан сўнг акциядорлар акциядорларнинг умумий йиғилиши кун тартибига киритилган ҳар бир масала ҳамда улар бўйича қабул қилинган қарорлар ва овоз бериш натижалари билан йиғилишни ўтказувчи операторнинг электрон платформасида танишиб чиқишлари мумкин;

- акциядорлар умумий йиғилиши баённомаси тузилгандан сўнг икки иш куни мобайнида қимматли қоғозлар бозорини тартибга солиш бўйича ваколатли органнинг

Жамиятнинг расмий веб-сайтларида муҳим фактлар ҳақидаги маълумотларни эълон қилиш орқали.

9.2. Акциядорлар умумий йиғилишининг баённомаси имзоланган куни Бошқарувга ижро этиш учун тақдим этилади. Акциядорлар умумий йиғилиши қарорларини ижро этиш, агар қарорда бошқача тарзда белгиланмаган ва умумий йиғилиш баённомасида акс эттирилмаган бўлса, Жамият Бошқаруви ва Кузатув кенгаши томонидан ўз ваколатлари доирасидаги масалалар бўйича ташкил этилади.

9.3. Акциядорларнинг умумий йиғилиши қарорларининг бажарилиши устидан назоратни, агар қарорда бошқача тартиб назарда тутилмаган ва йиғилиш баённомасида акс эттирилмаган бўлса, Жамиятнинг Кузатув кенгаши амалга оширади.

9.4. Акциядорлар умумий йиғилишининг қарорлари умумий йиғилишда иштирок этган ва иштирок этмаган барча акциядорлар учун уларга тегишли қисмда мажбурийдир.

## **Х. ЯКУНИЙ ҚОИДАЛАР**

10.1. Ушбу Низом Акциядорларнинг умумий йиғилиши томонидан тасдиқланганидан кейин кучга киради.

10.2. Ушбу Низомга амалдаги қонунчиликка киритилган ўзгаришлар муносабати билан ва/ёки Жамиятнинг Уставига киритилган ўзгартириш ва қўшимчалар муносабати билан ўзгартириш ва/ёки қўшимчалар киритилиши мумкин.

10.3. Ўзбекистон Республикасининг қонунчилигига ўзгартиришлар киритилиши натижасида, ушбу Низомнинг айрим қоидалари қонун ҳужжатларига зид келиб қолган тақдирда, Низомнинг амалдаги қонун ҳужжатларига зид бўлмаган қисми амал қилишда давом этади. Низомнинг Ўзбекистон Республикаси амалдаги қонунчилигига зид бўлган қисмлари ўз кучини йўқотади ва акциядорлар умумий йиғилишининг ушбу қисмдаги фаолияти Ўзбекистон Республикаси қонунчилигининг тегишли нормалари билан тартибга солинади